

楚辭

集

千離

騷

字騷

集

文

註

萃

傳

辨證
後語
(四)



2121

1

11820

楚

辭

集

註

辨證
後語

四

朱
熹
撰

中華書局

叢書集成初編

楚辭集注 辨證後語（及其他兩種） 四冊

中華書局出版發行

（北京王府井大街三十六號）

秦皇島市資料印刷廠印刷
一九九一年北京第一版

開本：七八七乘一〇九二毫米 三十二分之一

統一書號：ISBN 7-101-00894-1/K·367

楚辭後語卷第四

登樓賦第二十一

登樓賦者、魏侍中王粲之所作也。歸來子曰：粲詩有古風，登樓之作，去楚詞遠，又不及漢，然猶過曹植、潘岳、陸機、愁詠、閑居、懷舊、衆作，蓋魏之賦極此矣。

登茲樓以四望兮，聊假日以銷憂。覽斯宇之所處兮，實顯敞而寡仇。挾清漳之通浦兮，倚曲沮之長洲。背墳衍之廣陸兮，臨臯隰之沃流。北彌陶牧，西接昭丘。華實蔽野，黍稷盈疇。雖信美而非吾土兮，曾何足以少留。遭紛濁而遷逝兮，漫踰紀以迄今。情眷眷而懷歸兮，孰憂思之可任。馮軒檻以遙望兮，向北風而開襟。平原遠而極目兮，蔽荆山之高岑。路逶迤以修迥兮，川既漾而濟深。悲舊鄉之擁隔兮，涕橫墜而弗禁。昔尼父之在陳兮，有歸歟之歎音。鐘儀幽而楚奏兮，莊舄顯而越吟。人情同於懷土兮，豈窮達而異心。惟日月之逾邁兮，俟河清乎其未極。冀王道之一平兮，假高衢而騁力。懼匏瓜之徒懸兮，畏井渫之莫食。步棲遲以徙倚兮，白日忽其將匿。風蕭瑟而竝興兮，天慘慘其無色。獸狂顧以求羣兮，鳥相鳴而舉翼。原野間其無人兮，征夫行而未息。心悽愴以感發兮，意忉忉而惻惻。循階除而降兮，氣交憤於暫臆。夜參半而不寐兮，悵盤桓以反側。

歸去來辭第二十二

歸去來辭者晉處士陶潛淵明之所作也。潛有高志遠識。不能俯仰時俗。嘗爲彭澤令。督郵行縣。且至。吏曰。當束帶見之。潛歎曰。吾安能爲五斗米折腰向鄉里小兒耶。卽日解印綬去。作此詞以見志。後以劉裕將移晉祚。恥事二姓。遂不復仕。宋文帝時。特徵不至。卒諡靖節徵士。歐陽公言。兩晉無文章。幸獨有此篇耳。然其詞義夷曠蕭散。雖託楚聲。而無其尤怨切蹙之病云。

歸去來兮。田園將蕪。胡不歸。旣自以心爲形役。奚惆悵而獨悲。悟已往之不諫。知來者之可追。實迷塗其未遠。覺今是而昨非。舟遙遙以輕颺。風飄飄而吹衣。問征夫以前路。恨晨光之熹微。乃瞻衡宇。載欣載奔。童僕歡迎。稚子候門。三徑就荒。松菊猶存。攜幼入室。有酒盈樽。引壺觴以自酌。眴庭柯以怡顏。倚南牕以寄傲。審容膝之易安。園日涉以成趣。門雖設而常關。策扶老以流憩。時矯首而遐觀。雲無心以出岫。鳥倦飛而知還。景翳翳以將入。撫孤松而盤桓。歸去來兮。請息交以絕游。世與我而相遺。復駕言兮焉求。悅親戚之情話。樂琴書以消憂。農人告余以春及。將有事乎西疇。或命巾車。或棹孤舟。旣窺窕以尋壑。亦崎嶇而經丘。木欣欣以向榮。泉涓涓而始流。喜萬物之得時。感吾生之行休。已矣乎。寓形宇內。能復幾時。曷不委心任去留。胡爲遑遑欲何之。富貴非吾願。帝鄉不可期。懷良辰以孤往。或植杖而耘耔。登東臯以舒嘯。臨清流而賦詩。聊乘化以歸盡。樂夫天命復奚疑。

鳴臯歌第二十三

鳴臯歌者。唐翰林供奉李白之所作也。白天才絕出。尤長於詩。而賦不能及魏晉。獨此篇近楚辭。然

歸來子猶以爲白才自逸蕩。故或離而去之者。亦爲知言云。

若有人兮思鳴臯。阻積雪兮心煩勞。洪河凌兢不可以徑度。冰龍鱗兮難容舸。邈仙山之峻極兮。聞天籟之嘈嘈。霜崖縞皓以合沓兮。若長風扇海湧滄溟之波濤。玄猿綠熊。猨談峩峩。危柯振石。駭膽慄魄。羣呼而相號。峯嶸嶸以路絕。挂星辰於巖壑。送君之歸兮。動鳴臯之新作。交鼓吹兮彈絲。觴清冷之池閣。君不行兮何待。若返顧之黃鶴。掃梁園之羣英。振大雅於東洛。市征軒兮歷阻折。尋幽居兮越巖嶧。盤白石兮坐素月。琴松風兮寂萬壑。望不見兮心氤氲。羅冥冥兮叢紛紛。水橫洞以下淥。波小聲而上聞。虎嘯谷而生風。龍藏谿而吐雲。寡鶴清唳。飢鼯嘯呻。塊獨處此幽默兮。愀空山而愁人。雞聚族以爭食。鳳孤飛而無鄰。蝦蟇嘲龍。魚目混珍。嫫母衣錦。西施負薪。若使巢由桎梏於軒冕兮。亦奚異乎夔龍蹀躞於風塵。哭何苦而救楚。笑何誇而却秦。吾誠不能學二子沾名矯節以耀世兮。固將棄天地而遺身。白鷗兮飛來。長與君兮相親。

引極第二十四

引極者。唐容管經略使元結之所作也。歸來子曰。結性耿介。有憂道閔俗之意。天寶之亂。或仕或隱。自謂與世聲牙。故其見於文字者。亦冲澹而隱約。譬古鍾磬。不諧於里耳。而詞義幽眇。玩之愜然。若有塵外之趣云。

天曠泚兮杳泬茫。氣浩浩兮色蒼蒼。上何有兮人不測。積清寥兮成元極。彼元極兮靈且異。思一見兮藐

難致。思不從兮空自傷。心慄勞兮意惶惶。思假翼兮鸞皇。乘長風兮上翔。揖元極兮本深實。餐至和兮永終日。

山中第二十五

山中人者唐尚書右丞王維之所作也。維以詩名開元間。遭祿山亂。陷賊中。不能死。事平。復幸不誅。其人既不足言。詞雖清雅。亦萎弱少氣骨。獨此篇與望終南。迎送神爲勝云。

山寂寂兮無人。又蒼蒼兮多木。羣龍兮滿朝。君何爲兮空谷。文寡和兮思深。道難知兮行獨。悅石上兮流泉。與松間兮草屋。入雲中兮養雞。上山頭兮抱犢。神與嶽兮如瓜。虎賈杏兮收穀。媿不才兮妨賢。嫌既老兮貪祿。誓解印兮相從。何詹尹兮可卜。

山中人兮欲歸。雲冥冥兮雨霏霏。水驚波兮翠管靡。白鷺忽兮鸞飛。君不可兮褰衣。山萬重兮一雲。混天地兮不分。樹陰隱兮氛氲。猿不見兮空聞。忽山西兮夕陽。見東臯兮遠村。平蕪綠兮千里。眇惆悵兮思君。望終南第二十六

望終南者王維之所作也。

晚下兮紫微。悵塵事兮多違。駐駟馬兮雙樹。望青山兮不歸。

魚山迎送神曲第二十七

魚山迎送神曲者王維之所作也。

坎坎擊鼓。魚山之下。吹洞簫。望極浦。女巫進。紛屢舞。陳瑤席。湛清醑。風淒淒兮夜雨。神之來兮不來。使我心兮苦復苦。紛進拜兮堂前。目眷眷兮瓊筵。來不語兮意不傳。作暮雨兮愁空山。悲急管。思繁絃。靈之駕兮儼欲旋。倏雲收兮雨歇。山青青兮水潺潺。

日晚歌第二十八

日晚歌者。唐著作郎顧況之所作也。況詩有集。然皆不及其見於章。應物詩集者之勝。歸來子錄其楚語三章。以爲可與王維相上下。予讀之。信然。然其朝上清者有曰。和爲丹兮靈爲馬。因乘之觴于瑤池之上兮。三光羅列而在下。則意非維所能及。然他語殊不近。故不得取。而獨采此篇。亦以爲氣雖淺短。而意若差健云。

日官官兮下山。望佳人兮不還。花落兮屋上。草生兮階間。日日兮春風。芳菲兮欲歇。老不可兮更少。君胡爲兮輕別。

復志賦第二十九

晁氏曰。復志賦者。唐文公韓愈之所作也。其自敘云。愈從隴西公平汴州。其明年七月。有負薪之疾。退休于居。作復志賦。以唐書考之。隴西公蓋董晉也。漢仲舒之後。自廣川徙隴西云。初。貞元十一年。宣武李萬榮死。李迺作亂。郭惟恭縛迺以歸朝廷。伏誅。德宗詔晉節度宣武軍。始奏愈觀察推官。晉受命。不召兵。直遣汴。惟恭謀亂。晉覺之。械送京師。軍還安。愈敘稱明年。則貞元十二年也。蓋愈自傷幼學。既壯而弗獲。思復其志。以晉知己。欲去未可云。

居悒悒之無解兮。獨長思而永歎。豈朝食之不飽兮。寧冬裘之不完。昔余之既有知兮。誠坎軻而艱難。當

歲行之未復兮。從柏氏以南遷。凌大江之驚波兮。過洞庭之漫漫。至曲江而乃息兮。逾南紀之連山。嗟日月其幾何兮。攜孤嫠而北旋。值中原之有事兮。將就食於江之南。始專專於講習兮。非古訓爲無所用。其心偷前脩之逸迹兮。超孤舉而幽尋。既識路又疾驅兮。孰知余力之不任。考古人之所佩兮。閱時俗之所服。忽忘身之不肖兮。謂青紫其可拾。自知者爲明兮。故吾之所以爲惑。擇吉日余西征兮。亦既造夫京師。君之門不可逕而入兮。遂從試於有司。惟名利之都府兮。羌衆人之所馳。競乘時而附勢兮。紛變化其難推。全純愚以靖處兮。將與彼而異宜。欲奔走以及事兮。顧初心而自非。朝聘驚乎書林兮。夕翔翔乎藝苑。諒却步以圖前兮。不浸近而逾遠。哀白日之不與吾謀兮。至今十年其猶初。豈不登名於一科兮。曾不補其遺餘。進既不獲其志願兮。退將遁而窮居。排國門而東出兮。慨余行之舒舒。時憑高以迴顧兮。涕泣下之交如戾洛師而悵望兮。聊浮遊以躊躇。假大龜以視兆兮。求幽貞之所廬。甘潛伏以老死兮。不顯著其名譽。非夫子之洵美兮。吾何爲乎淩之都。小人之懷惠兮。猶知獻其至恐。固余異於牛馬兮。寧止乎飲水而求芻。伏門下之默默兮。竟歲年以康娛。時乘間以獲進兮。顏垂歡而愉愉。仰盛德以安窮兮。又何忠之能輸。昔余之約吾心兮。誰無施而有獲。嫉貪佞之滂濁兮。曰吾其既勞而後食。懲此志之不脩兮。愛此言之不可忘。情招恨以自失兮。心無歸之茫茫。苟不內得其如斯兮。孰與不食而高翔。抱關之阨陋兮。有肆志之揚揚。伊尹之樂於畎畝兮。焉富貴之能當。恐誓言之不固兮。斯自訟以成章。往者不可復兮。冀來今之可望。

閔己賦第三十

晁氏曰：閔己賦者，韓愈之所作也。愈去汴州，依武寧張建封，辟府推官，以觀察稱。後遷監察御史，上疏極論宮市，德宗怒，貶陽山令。時貞元十八年也。憲宗即位，始召爲國子博士，稍遷職方員外郎，坐論柳闇事，復爲博士。愈才高，數黜官，頗自傷其不遇，故此賦云：就水草以休息兮，恒未安而既危。君子有失其所兮，小人有得其時。蓋思古人靜俟之義，以自堅其志，終之於無悶云。

余悲不及古之人兮，伊時勢而則然。獨閱閔己，曷已兮。憑文章以自宣，昔顏氏之庶幾兮。在隱約而平寬，固哲人之細事兮。夫子乃嗟嘆其賢，惡飲食乎陋巷兮。亦足以頤神而保年，有至聖而爲之依歸兮。又何不自得於艱難，曰：余昏昏其無類兮。望夫人其已遠，行舟楫而不識四方兮。涉大水之漫漫，勤祖先之所貽兮。勉汲汲於前脩之言，雖舉足以蹈道兮。哀與我者爲誰，衆皆捨而已用兮。忽自惑其是非，下土茫茫其廣大兮。余豈不知其可懷，就水草以休息兮。恒未安而既危，久舉拳其何故兮。亦天命之本宜，惟否泰之相極兮。咸一得而一違，君子有失其所兮。小人有得其時，聊固守以靜俟兮。誠不及古之人兮，其焉悲。

別知賦第三十一

晁氏曰：別知賦者，韓愈之所作也。愈論宮市，貶陽山之明年，則歲癸未也。時楊館之爲湖南支使，以使來，愈愛儀之，以謂智足以遣難，才足以立事，忠足以動上，惠足以存下。又修之以詩書六藝之學，宜其從事於是府，而流聲實於天朝也。以此宣州李博，崔寧實主謂非己以爲邑長於斯而媚夫人者，比以送楊歸湖南序考之，愈自謂知儀之故，於其別爲此賦。不知與閔己孰先後，而復志閔己愈自道也，故以先別知。

余取友於天下，將歲行之兩周。下何深之不卽，上何高之不求。紛擾擾其既多，咸喜能而好修。寧安顯而

獨裕。願阨窮而共愁。惟知心之難得。斯百一而爲收。歲癸未而遷逐。侶蟲蛇於海陬。遇夫人之來使。關公館而羅羞。索微言於亂志。發孤笑於羣憂。物何深而不鏡。理何隱而不抽。始參差以異序。卒爛漫而同流。何此歡之不可恃。遂駕馬而迴軌。山礧礧其相軋。樹蓊蓊其相摻。雨浪浪其不止。雲浩浩其常浮。知來者之不可以數。哀去此而無由。倚郭郭而掩涕。空盡日以遲留。

訟風伯第三十二

吳氏曰。訟風伯者。韓愈之所作也。早以諡時澤不下流。風以比小人。實爲此厲。雲以婉君子。欲施而不可得。以夫爲此厲者間之也。此楚辭也。而近詩投畀有昊之義。故繫之於此云。

維茲之旱兮。其誰之由。我知其端兮。風伯是尤。山升雲兮。澤上氣。雷鞭車兮。電搖轍。雨淒淒兮。將墜。風伯怒兮。雲不得止。嗚烏之仁兮。念此下民。閔其光兮。不闢其神。嗟風伯兮。其獨謂何。我於爾兮。豈有其他。求其時兮。修祀事。羊甚肥兮。酒甚旨。食足飽兮。飲足醉。風伯之怒兮。誰使。雲屏屏兮。吹使醺之。氣將交兮。吹使離之。樂之使氣不得化。寒之使雲不得施。嗟爾風伯。欲逃其罪。其又何辭。上天孔明兮。有紀有綱。今我上訟兮。其罪誰當。天誅加兮。不可悔。風伯雖死兮。人誰汝傷。

弔田橫文第三十三

吳氏曰。弔田橫文者。韓愈之所作也。愈有大志。不爲世知。故行經橫墓。感其義高。能得士。而取酒祭橫。爲文以弔之。有傷時思古。慨然有不可復見之意。然田橫安足道哉。故其旨曰。非今世之所希。孰爲使余歎歎而不可禁也。又唐宰相如董晉。亦未足言。而曾爲

汴州。後義愈從事。意終始惑過。語稱關西公而不姓。後從裴度。亦自謂度知己。然度亦終不引愈共天下事。自古以文學擅世名。世忌之。率不得大柄。雖有世名。如世不知。故意闊踴發憤太息於區區之橫。以謂夫苟如橫之好士。天下將有賢於五百人者。至焉。

事有曠百世而相感者。余不自知其何心。非今世之所稀。孰爲使余歔歔而不可禁。余既博觀乎天下。曷有庶幾乎夫子之所爲。死者不復生。嗟余去此其從誰。當秦氏之敗亂。得一士而可王。何五百人之擾擾而不能脫夫子於劍鏑。抑所寶之非賢。亦天命之有常。昔闕里之多士。孔聖亦云其遑遑。苟余行之不迷。雖顛沛其何傷。自古死者非一。夫子至今有耿光。踴陳辭而薦酒。魂髣髴而來享。

享羅池第三十四

吳氏曰。享羅池者。韓愈之所作也。愈善柳宗元。宗元爲柳州刺史。且死。語其所常與遊者曰。吾謫於此。與若等相好也。明年。吾當死。死而爲神。若等嗣我。如期而投。爲羅池神。且能動於靈寢。愈傷宗元。爲銘以實其事。自唐史臣非之。夫神不可知。孔子迺不語。雖然。此非銘羅池神之文也。愈用宗元之文也。

荔子丹兮蕉黃。雜肴蔬兮進侯堂。侯之舩兮兩旗。度中流兮風泊之。待侯不來兮。不知我悲。侯乘駒兮入廟。慰我民兮不嘯以笑。鵝之山兮柳之水。桂樹圍園兮。白石齒齒。侯朝出游兮。暮來歸。春與猿吟兮。秋鶴與飛。北方之人兮。爲侯是非。千秋萬歲兮。侯無我違。福我兮壽我。驅厲鬼兮山之左。下無苦濕兮。高無乾。杭稌充羨兮。蛇蛟結蟠。我民報事兮。無怠。其始自今兮。欽于世世。

琴操第三十五

吳氏曰琴操者韓愈之所作也。愈博學羣書，奇辭奧旨，如取諸室中物，以其所涉博，故能約而爲此也。夫孔子於三百篇，皆弦歌之，操亦弦歌之辭也。其取與幽眇，怨而不盲，最近離騷。離騷本古詩之衍者，至漢而衍極，故離騷琴操與詩賦同出而異名，蓋衍復於約者，約故去古不遠，然則後之欲爲離騷者，惟約猶近之，十操取其四，以近楚辭，其刪六首者，詩也。

將歸操，孔子之趙，聞殺鳴犢作。

秋之水兮，其色幽幽。我將濟兮，不得其由。涉其淺兮，石齧我足。乘其深兮，龍入我舟。我濟而悔兮，將安歸。尤歸兮，歸兮，無與石鬪兮，無應龍求。

龜山操，孔子以季桓子受齊女樂，諫不從，望龜山而作。

龜之氣兮，不能雲雨。龜之枿兮，不中梁柱。龜之大兮，祇以奄魯。知將墮兮，哀莫余伍。周公有思兮，嗟余歸輔。

拘幽操，文王美里作。

目窈窕兮，其凝其盲。耳肅肅兮，聽不聞聲。朝不日出兮，夜不見月與星。有知無知兮，爲死爲生。嗚呼，臣罪當誅兮，天王聖明。

殘形操，曾子夢見一狸，不見其首作。

有獸維狸兮，我夢得之。其身孔明兮，而頭不知。吉凶何爲兮，覺坐而思。巫咸上天兮，識者其誰。

楚辭後語卷第五

招海賈文第三十六

吳氏曰招海賈文者唐柳州刺史柳宗元之所作也昔屈原不過於楚傍徨無所依欲乘雲騎龍遨遊八極以從已志而不可猶也然念其故國至於將死精神離散四方上下無所不往又有乘鬼虎豹怪物之害故大招其魂而復之旨皆不若楚國之樂者招海賈文雖變其義蓋取諸此也言賈尚不可爲而又浮於海大泊滄海八方易位魚龍神怪其禍不測孰與上黨易野出入无虞而可樂哉上黨亦晉地宗元以謂崎嶇冒利遠而不復不知已故鄉常產之樂亦以飄世之士行險以徵幸不如居易以俟命云

咨海賈兮君胡以利易生而卒離其形大海盤泊兮顛倒日月龍魚傾側兮神怪驟突滄茫無形兮往來遽卒陰陽開闔兮氛霧滄渤君不返兮逝恍惚舟航軒昂兮下上飄鼓騰越嶢嶢兮萬里一覩崒入泓坳兮視天若畝奔螭出扑兮翔鵬振舞天吳九首兮更笑迭怒垂涎閃舌兮揮霍旁午君不返兮終爲虜黑齒棧巖鱗文肌三角駢列耳離披反斷叉牙踔欲崖蛇首猗鬣虎豹皮羣沒互出謹遨嬉臭腥百里霧雨瀾君不返兮以充飢弱水蓄縮其下不極投之必沉負羽無力鯨鯢疑畏淫淫嶷嶷君不返兮卒自賊怪石森立涵重淵高下週置滔危顛崩濤搜疏剡戈鋌君不返兮晝沉顛其外大泊汙齋淪終古迴薄旋天垠八方易位更錯陳君不返兮亂星辰東極傾海流不屬泯泯超忽紛盪沃殆而一跌兮沸入湯谷舳艫霏解梢若木君不返兮魂焉薄海若噉貨號風雷巨鼉領首丘山頽猖狂震號翻九垓君不返兮糜以摧咨海賈兮君胡樂出幽險而疾平夷恂駭愁苦而以忘其歸上黨易野恬以舒蹈蹂厚土堅無虞岐路脉

布彌九區。出無入有。百貨俱周。游戲傲睨。神自如。撞鍾擊鮮。恣歡娛。君不返兮。欲誰須。膠鬲得聖。捐鹽魚。范子去相。安陶朱。呂氏行賈。南面孤。弘羊心計。登謀謨。袁鹽大治。九鄉居。祿秩山委。收國租。賢智走諸。爭下車。逍遙縱傲。世所趨。君不返兮。諒爲愚。咨海賈兮。賈尙不可爲。而又海是圖。死爲險魄兮。生爲貪夫。亦獨何樂哉。歸來兮。寧君軀。

懲咎賦第三十七

晁氏曰。懲咎賦者。柳宗元之所作也。貞元十九年。宗元爲監察御史。裏行時年三十三矣。王叔文。韋執誼用事。二人奇其才。引納禁中。與計議。擢禮部員外郎。欲大用之。俄而叔文敗。宗元與劉禹錫等七人俱貶。而宗元爲永州司馬。元和十年。乃徙柳州刺史。以卒。初。宗元竄斥。崎嶇蠻瘴間。埋垢感鬱。一寓於文。爲離騷數十篇。懲咎者。悔志也。其旨曰。有餘齒之有懲兮。蹈前烈而不顧。後之君子。欲成人之美者。讀而悲之。

懲咎愆以本始兮。孰非余心之所求。處卑汙以閱世兮。固前志之爲尤。始余學而觀古今。怪今昔之異謀。惟聰明爲可考兮。追駿步而遐游。潔誠之旣信直兮。仁友藹而萃之。日施陳以繫磨兮。邀堯舜與之爲師。上雖阨而混茫兮。下駁詭而懷私。旁羅列以交貫兮。求大中之所宜。曰道有象兮。而無其形。推變乘時兮。與志相迎。不及則殆兮。過則失貞。謹守而中兮。與時偕行。萬類芸芸兮。率由以寧。剛柔弛張兮。出入綸經。登能抑枉兮。白黑濁清。蹈乎大方兮。物莫能嬰。奉訐謔以植內兮。欣余志之有獲。再徵信乎策書兮。謂炯然而不惑。愚者果於自用兮。惟懼夫賊之不一。不顧慮以周闕兮。專茲道以爲服。譏妬構而不戒兮。猶斷斷於所執。哀吾黨之不淑兮。遭任遇之卒迫。勢危疑而多詐兮。逢天地之否隔。欲圖退而保已兮。惜乖期。

乎曩昔。欲操術以致忠兮。衆呀然而互嚇。進與退吾無歸兮。甘脂潤乎鼎鑊。幸皇鑒之明宥兮。繫郡印而南適。惟罪大而寵厚兮。宜夫重仍乎禍譴。既明懼乎天討兮。又幽慄乎鬼責。惶惶乎夜寤而晝駭兮。類磨礱之不息。凌洞庭之洋洋兮。汜湘流之汙汙。飄風擊以揚波兮。舟摧抑而迴遘。日霾晦以昧幽兮。黝雲涌而上屯。暮屑宰以淫雨兮。聽嗷嗷之哀猿。衆鳥萃而啾號兮。沸洲渚以連山。漂遙逐其詎止兮。逝莫屬余之形魂。攢糞奔以紆委兮。束洶湧之崩湍。呿尺進而尋退兮。盤迴汨乎淪漣。際窮冬而止居兮。羈纍莽以縈纏。哀吾生之孔艱兮。循凱風之悲詩。罪通天而降酷兮。不亟死而生爲。逾再歲之寒暑兮。猶質質而自持。將沈澗而隕命兮。詎蔽罪以塞禍。惟滅身而無後兮。顧前志猶未可。進路呀以劃絕兮。退伏匿又不果。爲孤囚以終世兮。長拘繫而輻軻。曩余志之脩潔兮。今何爲此戾也。夫豈貪食而盜名兮。不混同於世也。將顯身以直遂兮。衆之所宜蔽也。不擇言以危肆兮。固羣禍之際也。御長轅之無橈兮。行九折之義義。却驚棹以橫江兮。汜凌天之騰波。幸余死之已緩兮。完形軀之既多。苟餘齒之有懲兮。蹈前烈而不顧。死蠻夷固吾所兮。雖顯寵其焉加。配大中以爲偶兮。諒天命之謂何。

閔生賦第三十八

晁氏曰。閔生賦者。柳宗元之所作也。宗元雅善蕭儔。在江嶺間。貽書言情云。宗元與罪人交十年。官以是進。導在附會。今天子定邪正。海內皆欣欣怡愉。而僕與四五子者。淪陷如此。豈非命歟。然居治平終身爲頑人之類。猶有少恥。未能盡忘。此蓋以叔文輩爲罪人。頑人謂已恥辱。雖在困事。當云爾者。然悔風極矣。其曰閔吾生之險阨兮。約衷志以達尤。蓋自以生之不幸。衷志而爲此云。

閔吾生之險阨兮，紛喪志以逢尤。氣沈鬱以杳眇兮，涕浪浪而常流。膏液竭而枯居兮，魄離散而遠遊。言不信而莫余白兮，雖追遠欲焉求。合喙而隱志兮，幽默以待盡。爲與世而斥繆兮，固離披以顛隕。騏驥之棄辱兮，驚駘以爲騁。玄虬蹶泥兮，畏避鼃黽。行不容之崢嶸兮，質魁壘而無所隱。鱗介稿以橫陸兮，鴟鵂羣而厲吻。心沈抑以不舒兮，形低摧而自慙。肆余目於湘流兮，望九疑之垠垠。波淫溢以不返兮，蒼梧鬱其蜚雲。重華幽而野死兮，世莫得其僞眞。屈子之悄微兮，抗危辭以赴淵。古固有此極憤兮，矧吾生之藐艱。列往則以考己兮，指斗極以自陳。登高崑而企踵兮，瞻故邦之殷幘。山水浩以蔽虧兮，路蒼勃以揚氛。空廬頽而不理兮，翳丘木之榛榛。塊窮老以淪放兮，匪魍魎吾誰鄰。仲尼之不惑兮，有垂訓之著言。孟軻四十乃始持心兮，猶希勇乎勳賁。顧余質愚而齒減兮，宜觸禍以貼身。知徒善而革非兮，又何懼乎今之人。噫禹績之勤備兮，曾莫理夫茲川。殷周之廓大兮，南不盡夫衡山。余囚楚越之交極兮，邈離絕乎中原。壤汙潦以填洳兮，蒸沸熱而恒昏。戲鳬鵲乎中庭兮，兼葭生於堂筵。雄虺蓄形於木杪兮，短狐伺景於深淵。仰於危而俯慄兮，弭日夜之拳拳。慮吾生之莫保兮，忝代德之元醇。孰眇軀之敢愛兮，竊有繼乎古先。明神之不欺余兮，庶激烈而有聞。冀後害之無辱兮，匪徒蓋乎羣愆。

夢歸賦第三十九

吳氏曰：夢歸賦者，柳宗元之所作也。宗元既貶，悔其年少氣銳，不識機微，久幽不還，復貽其所知許孟容書，其略云：立身一敗，萬事瓦裂，墳墓不掃，宅三易主，恐一日死，曠墜先緒，遺託孟容以少壯者，故作夢歸賦，初言覽故都喬木而悲，中言仲尼欲居九夷，老子